

Culturito

Vicky Arens-Tjon A-Tjoe

Introduccion di Culturito


Permiti mi sera bo conoci cu e pagina Culturito, un pagina nobo den bo Pan Cayente cu ta realisa pa Cas di Cultura y colaboradornan den e gremio di arte y Cultura na Aruba. Cu e pagina aki nos kier trece boso na altura di tur actividad, lugar, hende, proyecto y desaroyo interesante riba e tereno cultural cu ta tuma lugar na nos isla, pero tambe den exterior. Nos no kier solamente trece hubentud mas cerca di cultura pero nos kier muestra tambe cu hubentud ya caba ta bon involucra cu actividadnan cultural y cu e interes den esaki como actividad extra-curricular ta creciendo.


Kiko e palabra 'cultura' kiermen pa bo?

Quisas bo ta relacione cu expresionnan tipico manera Dera Gay, nos Himno y Bandera, Carnaval etc. Esaki ta un par di e 'linknan' so, pero cultura ta mas cu esaki. Tur cos rond di bo, custumbernan di un pais, pero tambe den bo mesun cas y tur tipo di expresion di arte ta cai bou di cultura. Den e pagina Culturito nos lo papia mas tanto riba cultura den e sentido di arte. Baile, canto, musica, teatro, poesia, arte plastico y e custumbernan di un pais cu ta wordo expresa pa medio di arte, tur ta expresionnan creativo pensa y traha door di hende y inspira riba un sin fin di cosnan y topiconan.

Tambe nos lo pone atencion riba estudionan den e ramonan di arte cu por wordo haci despues di bo middelbare school. Aruba mester di su hendenan studia riba e tereno aki tambe. No subestima e poder cu arte tin riba e desaroyo sano di un pais, tanto pa su mes hendenan como pa locual e pais ta proyecta pa resto di mundo.

Nos topico Culturito di e luna aki ta Cas di Cultura, e teatro nacional y centro cultural di Aruba cu ta bezig cu un par di proyecto nobo pa hubentud y comunidad en general.





Historia

Na aña 1958 e portanan di Cas di Cultura a habri pa prome biaha pa por brinda e comunidad di Aruba un lugar na unda tur clase di arte por wordo ehecuta, exhibi y mira. E arkitekto F. Zingel, cu tambe a diseña, Centro Pro Arte y misa di Brievengat na Curaçao, a diseña e edificio. For di comienso e fundacion Stichting Schouwburg Aruba a maneja Cas di Cultura y te dia di awe ainda ta percura pa e edificio ta bon manteni pa por duna comunidad e servicio cu e merece.

Uso y espacio

Tur clase di actividad y evento ta tuma lugar na Cas di Cultura, entre otro: obra di teatro, concierto, recital di baile, seminario, film, recepcion y exposicion di arte. E auditorio cu su stage y 572 stoel ta bon ekipa pa tur clase di recital y show. E sala di exposicion ta multifuncional y por carga 100 hende. Aki den por tene exhibicion, seminario, recepcion y show chikito. E foyer y patio tropical por wordo usa entre otro pa recepcion y celebracion chikito. Tambe C'arte e café di Cas di Cultura ta habri durante tur e actividadnan y ta haci catering pa actividad priva cu ta desea di inclui 'food & beverage'. Conhuntamente cu e cliente, Cas di Cultura por hasi e evento bira un exito!

Centro Cultural

Locual ta haci Cas di Cultura un centro cultural mas completo ta cu Skol di musica Rufo Wever, Skol di baile Diana Antonette y e fundacion cultural UNOCA tur ta situa den e edificio. Den futuro Cas di Cultura lo crea mas oportunidad pa workshop den diferente disiplina di arte y

tambe e ta bai hunga un rol mas fuerte den e programacion cultural na Aruba. Un acento special lo wordo poni riba e educacion cultural di nos hobennan pa medio di produccionnan y funcion pa skolnan. E campaña di poster 'Cua ta bo rol' tabata e inicio di e concientisacion di nos hobennan pa cu arte en general. Cas di Cultura ta haña su rol como educador den e ramonan di arte y cultura sumamente importante y e ta su prioridad pa den futuro e traha riba e enrikesimento di esakinan riba nos isla.

Trevia, e Garado di Djaka

Den november cu december 2006 e audicionnan a tuma lugar di e prome produccion musical di Cas di Cultura 'Trevia, e Garado di Djaka', cu lo tuma lugar na juni 2007. E storia ta basa riba esun di De Rattenvanger van Hamelen. Cas di Cultura tabata hopi contento pa wak e interes grandi entre hobennan pa cu e musical aki. 28 adulto y hoben a wordo recruta pa e obra y e ensayonan ta mustrand cu e ta bai ta un show masha great mes! E publico lo keda sorprende cu e talentonan lokal cu lo canta, baila y actua riba e stage den e decor special diseña pa e obra. Keda pendiente pa mas noticia riba e musical aki. Te aki nos ta keda cu e Culturito aki, te otro biaha. 'Life is like a work of art, treat yours like it's a masterpiece!'.